

Hvala Allahu, Gospodaru svjetova! Salavat i selam neka je na Allahova poslanika, Muhammeda, s.a.v.s., njegovu porodicu, ashabe i sve one koji ga slijede na putu islama!

O ljudi, jedite od onoga što ima na Zemlji, ali samo ono što je dopušteno i što je prijatno, i ne slijedite šejtanove stope, jer vam je on neprijatelj očevidni! (Bekare, 168)

Poštovana braćo i sestre, draga djeco i omladino, esselamu alejkum!

U jednoj od prethodnih hutbi spominjali smo hadis Allahova Poslanika, s.a.v.s, u kojem se kaže da je halal jasan i da je haram jasan a da između njih postoje sumnjive stvari koje većina ljudi ne zna. Rekli smo da je ova podjela prisutna u svakom aspektu našeg života; radu, poslovanju, razgovoru, odmoru itd.

Jedan poseban aspekt našeg života na koji Kur'an često ukazuje a kojem, nažalost, mi ne posvećujemo dovoljno pažnje jeste vođenje računa o našoj ishrani tj. hrani i piću.

Brojni su ajeti i hadisi koji upozoravaju muslimane da vode računa o svojoj ishrani i da konzumiraju samo ono što je dozvoljeno. Danas kada znamo koliki utjecaj ima hrana na fizičko i mentalno zdravlje čovjeka, uopće nas ne treba čuditi insistiranje Kur'ana na halal ishrani.

Ali ne zaboravimo da hrana ne samo da ima utjecaj

na naše fizičko i mentalno zdravlje nego ona ima itekako veliki utjecaj i na naše vjersko stanje.

U ajetu kojeg smo citirali na početku hutbe Uzvišeni Allah nas upozorava da jedemo samo ono što je halal i tajjib (prijatno, kvalitetno) a ne pridržavanje toga i izlaženje van granica halala naziva se slijeđenjem šejtana. U suri Ta-Ha Uzvišeni Allah, kaže: **“Jedite ukusna (tajjib – dobra, kvalitetna) jela kojima vas opskrbljujemo i ne prelazite granice da vas ne bi snašla srdžba Moja; a koga snađe srdžba Moja – nastradao je!”** (Ta- Ha, 81)

Obratite pažnju da u ovom ajetu Allah za onog tko pored halal hrane i pića uzima haram kaže da prelazi granicu i prijeti mu da će ga zbog toga snaći Allahova srdžba.

Naravno, da Allahova srdžba spada i na one koji prodaju haram i prisjetimo se da je Allahov poslanik, s.a.v.s., prokleo osobe koje imaju bilo kakvu vezu s alkoholom i sve ih obuhvatio kroz deset kategorija.

Nadalje, podsjetimo se na hadis Poslanika, s.a.v.s, u kojem on spominje **čovjeka koji nakon dugog puta, prašnjav i raščupan, diže ruke i moli: ‘O, Gospodaru, o Gospodaru!’**, a hrani se od harama, pije od harama, oblači se od harama i odgojen je na haramu. **Kako da mu se Allah odazove!?”**

U ovom hadisu se spominju tri situacije u kojima se čovjeku prima dova, a to su:

1. Putovanje: Allahov Poslanik, s.a.v.s., je rekao:

“Tri dove (molbe) se primaju, u to nema sumnje: dova onoga kome je nepravda učinjena, dova putnika, dova roditelja za dijete.” (Tirmizi)

2. Stanje prašnjavog, iscrpljenog čovjeka: Muslim bilježi da je Allahov Poslanik, s.a.v.s., rekao: **“Koliko je raščupanih i prašnjavih ljudi u dronjcima kojima vrata ne otvaraju, a ako bi zamolili Allaha, udovoljio bi im.”**

3. Dizanje ruku s molbom Allahu: Selman, r.a., prenosi da je Allahov Poslanik, s.a.v.s., rekao: **“Doista je Allah stidljiv i plemenit, stidi se da kada čovjek podigne ruke ka nebu da ih vrati prazne.”** (Turmizi)

Čovjek koji se spominje u hadisu kod sebe ima sve tri velike predispozicije da mu dova bude primljena, dovoljna je samo i jedna od njih kao što smo čuli, ali njemu je dova ipak odbijena zbog njegove haram ishrane.

Braćo i sestre, s obzirom da suvremeni čovjek velikom većinom mali dio hrane za sebe proizvodi i mnogo veći dio kupuje, proizvođači vođeni željom za što većim profitom često ne posvećuju veliku pažnju kvalitetu onog što proizvode nego im je prvenstveni cilj proizvesti što veći broj što jeftinijih proizvoda i privući što više kupaca.

U toj svoj želji da privuku kupce jeftinim cijenama nije rijedak slučaj da im prodaju i nešto što ljudi uopće ne bi kupili da znaju šta kupuju. U prošlosti

smo bili a i sada smo svjedoci bolesti i epidemija kao što su kravlje ludilo, ptičja gripa i sl. koje su direktna posljedica ljudske pohlepe i pogrešne ishrane tih životinja. A da ne govorimo o tome da su ljudi spremni prodati i meso uginule životinje kao meso zdrave životinje ili meso jedne vrste pod imenom druge i slično tome. Sve za profit!

Također, danas je gotovo nezamisliva proizvodnja hrane i prehrambenih artikala bez aditiva. To su kemijske supstance koje se u malim količinama dodaju različitim namirnicama i proizvodima, radi njihove stabilizacije ili poboljšanja nekih svojstava. Oni najčešće služe za poboljšanje boje, okusa i mirisa, te za konzerviranje. Oni se na etiketi proizvoda obilježavaju slovom E i određenim brojem. Neki od njih su dozvoljeni a neki zabranjeni, zavisno od čega su napravljeni. Postoje spiskovi tih sumnjivih, nepoželjnih i haram aditiva. Također postoje i aplikacije za pametne telefone koje su napravili muslimani i u kojima se može vidjeti kojoj vrsti pojedini emulgator pripada. Svejedno, sve je teže pratiti danas jer i proizvođači se služe raznim trikovima da prikriju sadržaje poput veoma sitnih slova na deklaracijama i slično.

Upravo zbog nemogućnosti da obični čovjek sve to prati danas postoje državne institucije koje vode računa o kvalitetu hrane.

Pored njih, jednu takvu instituciju je osnovala i Islamska zajednica a to je Centar za certificiranje halal kvalitete. Ova agencija prati i kontrolira proizvodnju hrane kompanija koje žele da dobiju njen certifikat i izdaje halal certifikate samo kompanijama za koje garantira da poštuju proceduru Halal standarda i da u njihovim proizvodima nema haram supstanci.

Kao što smo vidjeli na početku hutbe musliman je dužan da vodi računa o svojoj ishrani, radi svog mentalnog, fizičkog i duhovnog zdravlja. Jedan od načina pokazivanja brige o našoj halal ishrani jeste da kupujemo proizvode kompanija koje su se odlučile na primjenu Halal standarda i na čijim proizvodima ima oznaka HALAL.

Molim Uzvišenog Allaha da budemo od onih koji će voditi računa o halalu i haramu u svakom aspektu svoga života, a da ne budemo od onih nemarnih i pohlepnih koji ne mare da li jedu ili prodaju haram. Uzvišeni Allahu, uputi nas Pravim putem i spasi od zabluda.

Amin

Prethodne hutbe potražite na našoj stranici: www.medzlis-split.org

Pripremio: Vahid ef. Hadžić
Split, 17.03.2017.

